

薛文清公全書

族

譜

三

河津薛氏重修族譜序

世之誇其譜牒者富貴而已矣以余所聞父老分
金宗黨招飲家有會食之鼓莊有贍養之田饑者
計口受糧寒者傾箱給絹士大夫之所以不棄其
親也若乃多藏而吝恃寵而驕至與其伯叔兄弟
視若途人又安望其關陌路之休戚而厯秦越之
肥瘠也哉自古世家大族其興也勃焉其亡也忽
焉受姓以來代有名門類非一姓而獨自孔顏曾
孟以至於周程張朱世世子孫食其舊德守其數

千百年數十百世之宗祊而迄無盛衰興廢之感
然則聖賢之所爲合族者其在此而不在彼乎薛
氏以文清公故爲河津名族今逾四百年傳二十
世矣其十七世孫乃昆琳謹惕十八世孫監生
其鼎庠生世璋毓秀等慮其世代杳遠而支派混
淆乃因舊譜續而修之譜無遙遙華胄系始於文
清公以上之五世前四世世系系無支庶五世官
教諭者生公及瑋瑋之後亦無考今之列於譜者
皆公之子孫也今夫明德之後必有達人以公之

性道文章其平時之現於精神意氣者足以孚夷
獠而泣老僕然且始厄於王振中撓於王文終沮
於石亨卒之見幾而作道與時違何天之豐其德
而嗇其遇耶抑將畱其有餘不盡之功業以光大
其苗裔耶則公之子孫有厚幸矣雖然子孫之所
不能必之於其宗祖者前之人幸已得之宗祖之
所不能必之於其子孫者後之人不可以不深長
思也蓋凡人之宗祖不過極之富豪貴胄其後人
蒙業而安亦惟是堂構垣墉勤塗墍茨而已莫不

稱願若夫繼公之志述公之事但使匹夫匹婦不
得其所卽與其天下一家中國一人之度量不相
肖也而况其族之本自一家而出於一人者哉公
今往矣公之靈爽常佑啓其後人故其子姓雖繁
從未有以不孝不弟犯齒犯上之事隕家聲而干
法紀者然則公之子孫誠有異乎凡人之子孫矣
其後日之寢昌寢熾又安知不藉聖賢之蔭而更
享富貴之福歟余向隨先君子行部至津常得拜
公之祠於今向往廿年又幸得官公之鄉樂觀夫

公之子孫並能尊祖敬宗以收其族也故爲道其
本於公者以爲之序

乾隆丁酉年秋八月

勅授文林郎知河津縣事加三級紀錄五次京江張
其昺撰

薛氏族譜序

薛黃帝後自奚仲受邑子登受氏歷年長矣代有顯人則明德之遺乎高皇帝手闢混濛乾坤載正扶輿之氣久滴乍凝篤生文濤羽儀聖代文清質隣天縱道繼聖修所謂曠代偉人寰區間氣不獨鍾毓河東冠冕當世而已嗣後雲耳繩緝最稱繁庶上焉入對金闕流芳桂籍次亦升榮上國發藻儒林卽素封黃馘之民亦以乃祖列祀瞽宗復其力世世無與于以見仁賢遺澤彌久彌新而明德紹休於前世有光矣

十一世孫葭州知州惟傑十二世孫河間府同知應麟東昌府照磨應第沁州訓導應闡十三世孫邠州知州士弘國子監生士傑等慮源遠或淆而莫辨支繁或泮而不屬于是本仁義率祖親別宗支明統系爲薛氏譜用視方來而又以高壻于薛子不佞壻于高抑有葭莩之誼焉則過而問序予惟敦本睦族禮有成言檢躬端慮以不負本始而隳家聲則有文清之遺訓在子復何言獨以薛之族巨也或有支滴焉而不合渙散焉而不屬則世德罔修而族之巨弗睦

矣嗟乎道非天畀弘之在人。不聞文清而光有世則
乃獨躬明德而儀後世。豈典型在望不能紹明光大
之至負本始而隕家聲。謂世德何矣。夫綱常倫理炳
若日星。人人佩服祖訓。恪守倫常。不以小加大。不
以少凌長。不以卑犯尊。不以衆暴寡。不以強欺弱。惟是
恩愛以相洽。敬讓以相先。吾不慮其渙而不萃。離而
不合也。詩曰。無念爾祖。聿修厥德。夫人亦修其德耳。
攷禮而求敦本睦族之道。固不易此矣。

萬曆四十二年三月吉日

賜進士第右春坊右庶子兼翰林院侍讀直起居

注管理

誥勅邑人趙用光哲臣謹序

薛氏譜序

聖學淵源之緒其接續者代不乏人至拘於一鄉一邑之中則古今不過二三人耳夫豈易言薪傳也哉龍門卽古西河先賢卜子夏設教之地厥後私淑於子夏之門者惟王文中子而去古愈遠者又惟薛文清公此僅求之於龍門不過之三子焉爾丁亥秋余奉檄署篆斯邑甫下車謁三賢祠遂慨然曰彼二子者固千載以上人也惟文清去今僅二百年耳豈無有存其遺緒者乎越二日生員薛祖清捧其先人文清公文集及其族譜

請序於余余曰此曠代偉人篤宗聖學列祀瞽宗誠龍門之儀範是宜有言者也今夫薛固自奚仲受邑子登受氏以後代有顯人文清其龍門之鍾毓乎抑明德後之達人乎至其族譜中則自文清以後登仕版者不勝枚舉我

朝聖學昌明人文蔚起凡山陬僻壤悉知則倣而繩其祖武昭茲來許守聖學之緒餘無負文清之遺澤余於薛氏子孫有厚望焉是爲序時

道光七年歲在丁亥冬月署河津縣知縣黃輔廷謹序

續刊薛氏族譜

例義

一自刑部員外祖以上八代名諱理宜敬避凡有誤犯者悉爲改正今後永爲定式

一世遠族繁或傳一世或傳數世無嗣者甚多難以備載止於同祖昆弟下以傳幾世無嗣概之

一無嗣中或一世數世內有職銜頂帶者盡錄之前徽不容沒也

一一子不得繼二門若必欲繼伯叔者則於本門下以

子某出繼書之宗支不容紊也

一現在者止一子令繼嗣兄弟則本名下仍照常例書之以其尙有待也

餘照舊例

首事人

庠生

世端 庠生

培基

思皇

在川

思峻 增生

謙光

庠生

祖清

思極

御祭文

維隆慶五年歲次辛未九月二十九日皇帝遣國子
監祭酒馬自強致祭于至聖先師孔子曰茲者廷臣
議奏故禮部左侍郎兼翰林院學士贈禮部尙書諡
文清薛瑄篤志聖賢潛心義理嘉言善行模範後人
理宜從祀爰命有司具主附於前代先儒之後以昭
盛典特遣祭告惟神鑒歆謹告

維弘治十年歲次丁巳月日平陽府知府杜忠欽奉
朝命致祭於禮部左侍郎兼翰林院學士諡文清薛

公曰惟公道學精深守官清介死生不二出處無疵
名重先朝澤遺後學理宜稱祀用致優崇茲惟仲春秋
式陳常薦公靈如在尙克享之

維成化元年歲次乙酉二月戊寅朔越二十四日辛
丑皇帝遣山西等處承宣布政使司右叅議徐行賜
祭于致仕禮部左侍郎兼翰林院學士薛瑄曰卿以
清才正學登名賢科歷仕累朝不懈于位擢風憲而
紀綱克振掌廷評而仁恕是存進佐春卿兼管學士
典絲綸於秘閣叅密勿於大猷位愈重而心愈謙德

彌隆而行彌慎辭榮歸老保晚節於優游慕義無窮
成後學於故里胡爲一疾遽爾告終追念往勞曷勝
嗟悼茲特遣官營葬用篤始終靈如有知尙其歆服